

Deklarasi hak asasi perlu diwujudkan di Malaysia

PUTRAJAYA 11 Ogos - Kerajaan digesa mewujudkan sebuah deklarasi hak asasi manusia yang lengkap dengan mencerminkan dan mengetengahkan nilai agama serta budaya masyarakat majmuk di negara ini.

Pensyarah Kanan Jabatan Pengajian Kenegaraan dan Ketamadunan Fakulti Ekologi Manusia, Universiti Putra Malaysia, Dr. Murni Wan Mohd. Nor berkata, langkah itu penting bagi memberikan definisi sebenar dan jelas mengenai hak asasi manusia serta batas-batasnya.

Beliau berkata, kandungan deklarasi itu perlu dibuat berlandaskan ajaran Islam tanpa mengetepikan nilai dan ajaran agama-agama lain di negara ini.

"Sekarang masih belum ada dokumen yang betul-betul memperincikan maksud hak asasi manusia. Malah, dalam Perlembagaan Persekutuan juga tidak menerangkan dengan jelas mengenai kebebasan tersebut."

"Penakrifan yang baik dan jelas perlu diberikan dengan mengambil kira skop hak asasi manusia secara khusus bagi mengelakkan timbulnya sebuah bentuk kekeliruan," katanya.

Beliau berkata demikian ketika membentangkan kertas kerja mengenai Hak Asasi Barat: Agenda dan Hipokrasinya sempena Halaqah Bicara Wasatiyyah di Pusat Konvensyen Antarabangsa Putrajaya (PICC) di sini hari ini.

Yang hadir sama Penasihat Agama kepada Perdana Menteri, Tan Sri Dr. Abdullah Md. Zin dan Pengarah Institut Wasatiyyah Malaysia (IWM) Jabatan Perdana Menteri, Da-

tuk Mohd. Yusof Din.

Mengulas lanjut, Murni berkata, konsep hak asasi manusia yang hendak diamalkan di negara ini perlu mengikut acuan sendiri tanpa dipengaruhi oleh pandangan Barat.

Katanya, pelaksanaan hak asasi manusia di negara-negara Barat bukan sahaja boleh dipersoalkan malah dilihat cenderung kepada sebelah pihak sahaja.

"Tiga tahun lalu, Israel telah menggunakan kuasa ketenteraan untuk mempertahankan negara mereka dengan melebihi had ditetapkan iaitu melancarkan serangan roket dan membedil peluru ke arah tempat awam seperti sekolah, hospital dan kawasan perumahan.

"Walaupun pegawai Pertubuhan Bangsa-bangsa Bersatu (PBB) berpendapat Israel telah mencabuli undang-undang antarabangsa dan mengeluarkan kenyataan mengutuk, tiada sebarang tindakan dikenakan terhadap Israel," katanya.

Sementara itu, Mohd. Yusof berkata, isu berkaitan hak asasi manusia perlu ditangani dengan sebaik mungkin kerana dibimbangi membawa pengaruh asing yang tidak baik.

"Kita bimbang sekiranya generasi muda di negara ini akan berjuang untuk mendapatkan kebebasan beragama, berpendapat dan berperilaku pada masa hadapan."

"Jika kita tidak memperjuangkan isu-isu hak asasi manusia dengan menerapkan nilai-nilai agama, dibimbangi golongan minoriti yang cenderung dengan konsep dari Barat akan mengambil peluang untuk menyebarkan fahaman mereka," katanya.